

DOMENIE V «VIE PAL AN»

Jutoris pe Liturgjie

Domenie, ai 4 di Fevrâr dal 2018

Te vite o vin vût ducj cualchi moment cussì colm di felicitât di podê concludi: Diu al è. Ma o vin vivût ancje il contrari: a son stadis circostancis di dolôr li che nus è scjampât di dî: Diu nol è.

Diu al è te nestre vite come la lune: tal colm e je une maravee, ma al rive ancje il moment che tu viodis di jê dome un fil di lûs o che e scomparis dal dut. Il dolôr, la tragjediè, une malatie prolungjade tai agns ti met in dubi la bontât dal Signôr, intant che nissun resonament al rive a dâ une rispueste clare al: parcè tant patî?

E je la riflession sconsolade di Jop te prime leture di vuê.

Noaltris si cjatìn vuê in glesie, a messe, tune liturgjie; la liturgjie no je la ore de discussion e dal resonament sul dolôr ma il moment de peraule di Diu scoltade e contemplade. O lin a messe, no par cirî resons su lis nestris peraulis ma par crodi a une peraule plui alte des nestris.

Cussì si cjatìn in cheste messe: no par discuti su lis tribulazions, ma par imparâ dal Mestri cemût rapuartâsi tes tribulazions.

Antifone di jentrade

Sal 94,6-7

Vignît, adorìn Diu,
butinsi a schene plete denant dal Signôr che nus à creâts;
al è lui il Signôr nestri Diu.

Colete

Ten cont di cheste tô famee, Signôr,
cuntun afiet che nol cognòs polse,
e, midiant che si poe dome inte sperance de gracie dal cîl,
vuardile simpri cu la tô protezion.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Jp 7,1-4.6-7

Gnots di tribulazion mi son stadis dadis.

Vele duncje une pagine di Jop! il libri che come nissun altri al cjale in muse la disumane tragjediè de umanitât. Ma noaltris o cjatìn za lis peraulis di Jop scritis te vite a cjase nestre o te cjase dongje o in país.

In chestis zornadis e je stade fate memorie dal stermini dai Ebreus... E television e gjornâi no sono plens ogni dì di naufragjos, atentâts, copadicis e torments?

Scoltìn i laments di Jop vierzint il cûr a la vôs des personis tribuladis che o cognossìn.

Dal libri di Jop

Jop al cjapà la peraule e al disè:
«L'om no frontal forsit une lote dure su la tiere
e i siei dîs no sono come chei di un mercenari?
Come il sclâf ch'al suspire l'ombrene
e come il mercenari ch'al spiete la sô pae,
cussì o ai vût dal distin mê di inlusion
e gnots di tribulazion mi son stadis dadis.
Se mi distiri, o pensi: «Cuant podaraio jevâ?»,
ma la gnot no finis plui

e o soi sfracaiât des pôris fint a l'albe.
I miei dîs a an corût plui svelts di une spolete
e si son consumâts cence sperance.
Visiti che la mê vite no je plui che une soflade,
e i miei vôi no viodaran mai plui il ben.
Peraule di Diu.

SALM RESPONSORIÂL

dal Salm 146

Une serie riflessione su la prime leture, nus mene in maniere naturâl a chê supliche incorade: Vuarissinus, Signôr, Diu de vite. Però, te scolte interiôr dal salm, chel vuarissinus si tramude tune invocazion di dolce fiducie tal Diu che al torne a fâ sù Gjerusalem, si sbasse a sanâ il cûr crevât e a medeâ lis nestris feridis.

R. Vuarissinus, Signôr, Diu de vite.

Se cjantât: Il cjant dai salms reponsoriâi, p. 142.

O ben:

R. Aleluia, aleluia, aleluia.

Al è biel cjantâi al nestri Diu;
al è propit dolç dâi sù la laude.
Il Signôr al torne a fâ sù Gjerusalem,
al tire dongje i fis di Israel sparniçâts su la tiere. **R.**

Chei ch'a an il cûr crevât lui ju risane
e al medee dutis lis lôr feridis.
Lui al conte il numar des stelis,
par non une par une lis clame. **R.**

Grant al è il nestri Diu
e cence confîn la sô potence.
Il Signôr al ten sù i piçui,
ma i triscj ju sdrume fin par tiere. **R.**

SECONDE LETURE

1 Cor 9,16-19.22-23

Puar mai me se no predicjâs il vanzeli!

A ogni batiât i è stade dade la consegne di predicjâ il vanzeli. Dome che la prime predicje no je chê de peraule predicjade a altris, ma chê de peraule di Gjesù meditate e vivude te pratiche de mê vite. In cheste maniere, al dîs il Concili Vatican II o predicjìn ducj, o sin ducj predis. La miôr predicje ancje in zornade di vuê e reste chê che nus racomande S. Pauli cul so esempi: mi soi fat servidôr di ducj.

De prime letare di san Pauli apuestul ai Corints

Fradis, par me predicjâ il vanzeli no je une braure; o sint une dibisugne, e puar mai me se no predicjâs il vanzeli! Se lu fasès di mê volontât, o varès la pae; ma no fasintlu di mê volontât, al vûl dî che mi è stade dade une consegne. Cuâl saraial alore il gno merit? Chel di predicjâ il vanzeli cence fâ valê il drit che il vanzeli mi da.

Di fat, seben ch'o soi libar denant di ducj, mi soi fat servidôr di ducj par vuadagnâ plui int ch'o podevi. Mi soi fat debul cui debui, par vuadagnâ i debui; mi soi fat dut a ducj, par salvâ in ducj i mûts cualchidun. E o fâs dut pal vanzeli, par vê part ancje jo cun lôr.

Peraule di Diu.

CJANT AL VANZELI

cf. Zn 6,63-68

R. Aleluia, aleluia.

Lis tôs peraulis, Signôr, a son spirt e vite.

Dome tu tu âs peraulis di vite eterne.

R. Aleluia.

VANZELI

Mc 1,29-39

Al vuari une vore di malâts di tantis malatiis.

Marc nus presente une sabide di Gjesù.

Gjesù, dopo jessi stât te sinagoghe a scoltâ la peraule di Diu e a preâ insieme cu la int, no si ritirà in cjase ma al viodè de madone di Simon e sore sere al vuari une vore di malâts e di indemoneâts.

Par Gjesù l'incuintri di preiere de buinore si sprolungje tal interessâsi concretamentri de comunitât rapresentade sore dut dai malâts. Par noaltris al è un clâr avvertiment che la messe, i sacraments, lis liturgiis, a restin un tamburel ch'al sglinghine (1 Cor 13, 1) se no si sprolungjin tune presince pe incressite de nestre comunitât. Di fat al dîs S. Jacum: Une religion monde e cence maglis denant di Diu nestri Pari e je cheste: viodi dai vuarfins e des veduis, dai tribulâts... (cfr. Ja 1, 27).

Al vâl in chest sens il vecjo sproc: Preâ e ben no fâ, a cjadaldiaul nol mancje di lâ.

Dal vanzeli seont Marc

In chê volte, Gjesù, jessût de sinagoghe, al rivà in cjase di Simon e di Andree, insieme cun Jacum e Zuan. La madone di Simon e jere tal jet cu la fiere, e i fevelarin subit di jê. Lui si svicinà, le cjapà pe man e le fasè jevà sù. La fiere le lassà e jê si metè a servîju.

Sore sere, dopo lâ a mont il soreli, i menavin denant ogni sorte di malâts e di indemoneâts. Dute la citât si jere dade dongje denant de puarte. Lui al vuari une vore di malâts di tantis malatiis e al parà fûr une vore di demonis, ma nol lassave che i demonis a fevelassin, parcè che lu cognossevin benon.

Tal indoman, une vore a buinore, al jevà, al jessi e si ritirà tun puest fûr di man, là che si fermà a preâ. Alore Simon cui siei compagns si metè a cirîlu e, dopo di vèlu cjatât, i disin: «A son ducj che ti cirin!». Ur dîs: «Anin di un'alte bande, tai borcs dulintor, par predicjâ ancje li. Par chest, di fat, o soi jessût». E al le predicjant tes lôr sinagoghis par dute la Galilee e parant fûr i demonis.

Peraule dal Signôr.

Su lis ufiertis

Signôr nestri Diu,

che tu âs creât il pan e il vin

soredut par sostentâ la nestre debolece,

fâs, par plasê,

ch'a deventin par nô ancje il sacrament de eternitât.

Par Crist nestri Signôr.

Antifone a la comunion

cf. Sal 106,8-9

Che i disin graciis al Signôr pal so boncûr,

pes robonis che ur à fat ai umign;

parcè che l'anime plene di sêt al à saciade

e l'anime plene di fan al à colmade di robe.

O ben: Mt 5,4.6

Furtunâts chei ch'a vain, parcè che a saran consolâts.

Furtunâts chei ch'a àn fan e sêt de justizie, parcè che a saran saciâts.

Daspò de comunion

Diu, tu âs volût ch'ò partecipassin
di un unic pan e di un unic cjaliç;
danus, par plasê, di diventâ une robe sole in Crist,
par vivi in serenitât e zovâi a la salvece dal mont.
Par Crist nestri Signôr.

* * *

Riflession di pre Antoni Beline: Indi à vuarîts une vore

A àn vût scrit e dit in tancj su la furtune che Crist al faseve, cuant che al passave paîs par paîs, borc par borc, pe tiere che al veve sielzût di nassi. Siguramentri al veve une fuarce interiôr fenomenâl, un voli che al travanave fûr par fûr, peraulis che dome lui al saveve dîlis in chê maniere e che ur davin sperance ancje ai plui disperâts tal cuarp e ta l'anime.

An sarà stâts mo ancje di curiôs e di superficiâi...

Vanseli par un popul, an B, p. 105.

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Dongje di un tribulât

***Se e baste une peraule no sta fâ un discors;
se e baste une atenzion, no sta proferî peraule;
se e baste la tô muse, lasse di bande il rest;
se al baste il cidin, no sta fâ di plui.***

p. David Maria Turoldo

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris*

dal popul furlan, Ed. Glesie Furlane, 2012.

* *Il cjant dai salms resposoriâi, Ed. Glesie Furlane, 2012.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

* *Par domandâ chescj libris scrivêt a info@glesiefurlane.org*

